

四庫全書

集部

欽定四庫全書

集部

湛然居士集卷八

詳校官中書_臣沈颺

主事_臣呂雲棟覆勘

總校官編修_臣王燕緒

校對官編修_臣施培應

謄錄監生_臣王英紱

欽定四庫全書

湛然居士集卷八

元 耶律楚材 撰

醉義歌

遼朝寺公大師者一時豪俊也賢而能文尤長於
歌詩其旨趣高遠不類世間語可與蘓黃並驅爭
先耳有醉義歌乃寺公之絕唱也昔先人文獻公
嘗譯之先人早逝予恨不得一見及大朝之西征

也遇西遼前郡王李世昌於西域予學遼字於李
公期歲頗習不揆狂斐乃譯是歌庶幾形容其萬

一云

曉來雨霽日蒼涼枕幃搖曳西風香困眠未足正展轉
兒童來報今重陽吟貌蒼蒼渾塞色客懷衮衮皆吾鄉
斂衾默坐思往事天涯三載空悲傷正是幽人嘆幽獨
東隣攜酒來茅屋憐予病竄伶仃愁自言新釀秋泉麪
凌晨未盥三兩卮旋酌連斟折欄菊我本清癯酒戶低

羈懷開拓何其速愁腸解結千萬重高談幾笑吟秋風
遙望無何風色好飄飄漸遠塵寰中淵明笑問斥逐事
謫仙遙指華胥宮華胥咫尺尚未及人間萬事紛紛空
一器纔空開一器宿醒未解人先醉攜樽挈榼近花前
折花顧影聊相戲生平豈無同道徒海角天涯我遐棄
我愛南村農丈人山溪幽隱潛脩真老病猶耽黑甜味
古風清遠途猶迤喧囂避遯巖麓僻幽閒放曠雲泉濱
旋春新黍爨香飯一尊濁酒呼予頻欣然命駕忽忽去

漠漠霜天行古路穿村迤邐入中門老幼蒼茫不寧處
丈人迎立瓦盃寒老母自供山菓醋扶攜齊唱雅聲清
酌酢溫語如甘澍謂子綠鬢猶可需謝渠黃髮勤相諭
隨分窮秋搖酒卮席邊籬畔花無數巨觥深筍新詞催
閒詩古語玄關開開懷囑酒謝予意村家不棄來相陪
適遇今年東鄙阜黍稷馨香棲畝畝相邀斗酒不浹旬
愛君蕭散真良友我酌一語白丈人解釋羈愁感黃耆
請君舉盞無言他與君却唱醉義歌風雲不與世榮別

石火又異人生何榮利儻來豈苟得窮通夙定徒奔波
梁冀跋扈德何在仲尼削迹名終多古來此事元如是
畢竟思量何怪此爭如終日且開樽駕酒乘杯醉鄉裏
醉中佳趣欲告君至樂無形難說似泰山載斷為深杯
長河釀酒斟酌之迷人愁容世無數呼來招耳充罰卮
一盃愁思初消鑠兩盞迷魂成勿藥爾後連澆三五卮
千愁萬恨風蓬落胸中漸得春氣和腮邊不覺衰顏却
四時為馭馳太虛二曜為輪輾空廓須臾從轡入無何

自然汝我融真樂陶陶一任玉山頽藉地為茵天作幕
丈人我語真非真真兮此外何足云丈人我語君聽否
聽則利名何足有問君何事徒劬勞此何為卑彼豈高
蜃樓日出尋變滅雲峰風起難堅牢芥納須彌亦閒事
誰知大海吞鴻毛夢裏蝴蝶勿云假莊周覺亦非真者
以指喻指指成虛馬喻馬兮馬非馬天地猶一馬萬物
一指同胡為一指分彼此胡為一馬奔西東人之富貴
我富貴我之貧困非予窮三界唯心更無物世中物我

成融通君不見千年之松化仙客節婦登山身變石木
魂石質既我同有情於我何瑕隙自料吾身非我身電
光興廢重相隔農丈人千頭萬緒幾時休舉觴酹酹忘形
跡

題恒岳飛來石

無盡居士題恒岳之飛來石有偈云石落黃河北山銜
白日西聰明厭血食悔不值元珪天下稱頌之為人磨
毀字文漫駁不復識矣有仁上人自恒山來請予復書

是偈欲刊諸舊文之側予應之曰無盡之妙言昭如日
月與天地而齊終豈風霾之能掩哉然不能拒上人之
請勉為之書己丑清明日湛然居士漆水耶律楚材晉
卿題

為慶壽寺作萬僧疏

竊以棲心物外已知四大之空寓跡塵中且賴十方之
供矧五常尤尊於博施而六度首重於檀那不求郡國
之英豪誰養林泉之跛挈芒鞋藜杖弗辭千里之勤糲

食蔬羹好助萬僧之化謹疏

太原開化寺草律為禪仍命予為功德主因作
疏

竊惟昔年開化今日為禪已蒙智老拈香又請湛然作
主尋行數墨一蠲教院家門運水般柴便有叢林氣息
謹疏

為石壁寺請信公庵主開堂疏

竊以達摩昔年莽鹵截鶴續鳧天寧今日顛預證龜作

驚可憐弄巧成拙不免出醜放乖我信公庵主受洞下

之宗風珮却波

天寧老人道號也

之心印參窮行說不到處踏

開偏正未分前既已降尊就卑何愧歷良為賤逢場作
戲請來鬧裏刺頭借水獻花便好穩處下脚謹疏

玉山圓明禪院請予為功德主因作疏

玉山乃雪嶠之故刹湛然實萬松之門人既是當家本
非生客春風秋月長聯萬葉之芳晨香夕燈永祝一人
之壽

萬卦山天寧萬壽禪寺命予為功德主因作疏

惟萬卦之古刹實萬松之舊遊有虛已

彦公道號

飛書請湛

然作主勉為提領良慰殷勤山色水聲永作道人活計
漁歌樵唱偷傳衲子家風謹疏

請某公庵主住竹林疏

狐死首丘是難忘於熟處心空及第何猶迷於故園我
某公庵主三頓打不回頭一唱全無入耳喫竹林飯廚
竹林矢嗣竹林法傳竹林禪打甌哄盆莫忘竹林之重

德披毛帶角好種竹林之道場

請湛公禪師住紅螺山寺疏

祖禰不了慚惶碧眼之老胡兒孫受殃架構紅螺之大
刹既是將錯就錯不免拈空拄空我湛公禪師韶陽遠
孫摩訶嫡子穿透三句語擊碎十法門便好住持更休
推讓滔天嶺上只圖同看有毛龜絕頂山頭且要共栽
無影樹謹疏

請容公和尚住竹林疏

慶壽慈悲拽擺犁而耕種竹林瀟洒嘆槽廠之空閒已
讓位而逃宜見機而作我容公禪師一條生鐵脊兩片
點鋼蜃叅透濟下沒巴鼻禪說得格外無滋味詁呵佛
罵祖且存半面人情揭海掀山別有一般關捩試問孤
峰頂上何如十字街頭若是本色瞎驢好趁大隊既號
通方水牯何必芒繩謹疏

請智公尼禪開堂疏

用管仲則安用豎刁則危賢愚政事叅萬松則謗叅延

洪則讚冷煖人情行窮萬里山川只是一天風月惟智
公禪師本有丈夫志不學老婆禪拈却花冠弗裝珍御
可駭特牛生特便好出頭勿謂牝鷄司晨不敢下嘴謹
疏

代劉帥請智公尼禪住報先寺

劉公隣
居報先

洗垢無緣乏遠井之救渴卜隣有德故近寺而敬僧我
智公禪師先禮報恩後叅奉福遠如舊總近似新深滋
鎖打開便請升堂啓戶明燈剔起願希鑿壁偷光謹疏

請某庵主開堂疏

和尚拽砵子不離寺內老鼠拖胡盧只在倉中某公庵
主先謁報恩再叅奉福升回斗轉因倒教傾十方利不
圖半文一石禪獨攬八斗莫學淘沙去來打破羅盆且
來量土唱籌熟謾敵將謹疏

為慶壽寺化萬僧疏

隱迹林泉置死生於度外隨身瓶鉢寄口腹於人間歛
隆三寶之風強遣萬僧之化何須異味唯求野菜淡黃

齋不用多般只求山田脫粟飯謹疏

請亨公庵主開堂疏

亨公庵主久叅萬松老人因緣不契再謁玉山大
愚和尚不期月罷叅予過大原玉山寺僧請予作
疏

萬松三頓不回頭玉山一釣便吞鉤大愚不似大愚老
脇下三拳即便休

三學寺改名圓明仍請予為功德主因作疏

本無男女等相着甚名模強分禪教者流且圖施設粵
三學之巨刹冠四海之名藍今改僧而舍尼遂從禪而
草律邀印公為粥飯頭請湛然為功德主根深蒂固常
聯萬葉之芳地久天長永祝一人之壽謹疏

平陽淨名院草律為禪請潤公禪師住持疏

竊以不居這那院好箇主人本無南北心悉為佛子謹
請懷仁潤老來住平陽淨名翡翠簾前請看木人之舞
琉璃殿上願聞布鼓之音謹疏

太原五臺寺請予為功德主因作疏

鎮三晉之雄藩有五臺之古剎獻花酌水改律為禪具
疏殷勤請予領略謹命休林常祝壽結箇好因緣為報
文殊莫放光不打遮鼓笛謹疏

請定公庵主出世疏

少林九年打坐祇得半提曹溪五派分開全沒一滴雖
是將無作有也要弄假像真我定公庵主洞下玄孫五
臺嫡子解造無米粥能撫沒絃琴既已炙地薰天須要

掀天翻海正逢開化枉閒有力叢林便好出頭莫戀無
明鬼窟謹疏

大龍山永寧石壁禪寺請忘憂居士為功德主
代為之疏

惟明月清風取之無禁者況龍巖石壁命予為主人煩
我一心護持謝他兩手分付千崑好景半文不費買山
錢數紙閒言一狀便充商稅契謹疏

代忘憂居士請琳公禪師住持壽寧禪寺疏

臨汝水之故邑有壽寧之巨藍歷代歸依百年煥顯乞
忘憂為功德主請琳公為粥飯人獨掌不浪鳴單手豈
成拍千年罕遇最難時節因緣一疏速來便是衲僧已
鼻謹疏

為大覺開堂疏三道

竊以門裏安身已早荆棘漫地崑中宴坐更知過犯彌
天請來偕坐升堂便好倩人問話引得轆轤轉也問甚
千遭萬遭快迭爐熬熱時盛搭一箇兩箇

其二

竊以雲門胡餅切忌咬嚼廬陵米價怎敢商量不甘公
案錯訛正要作家批判伏惟興公和尚佩聖安之正印
透韶陽之上關莫守命鬼窟中三彈不動快橫身虎口
裏一勘便招

其三

竊以逢人不出出則便為人傍觀者哂逢人便出出則
不為人當局者迷直須一箭透重圍不得三心或二意

自甘入室渾如豹膽熊心不肯陞堂却是蟲頭鼠尾

司天判官張居中六壬祛惑鈴序

予故人張正之世掌義和之職通經史百家之學尤長於三式與予參商且二十年矣癸巳之春既克汴梁渠入覲於朝形容變盡惟語音存耳乘閒因出書一編曰六壬祛惑鈴予再四譯之引式明例皆有所據或有隱奧人所未通者釋以新說蓋採諸經之所長無所矛盾者取其折衷為一家之書近代未之有也求傳寫者既衆其同

列請刊行以廣其傳予忻然為引以題其端癸巳中秋
日湛然居士漆水耶律楚材晉卿序

苗彥實琴譜序

古唐棲巖老人苗公秀實其名彥實其字博通古今尤
長於易應進士舉兩入御闈而不捷乃拂袖去之公善
於琴事為當世第一蓋嘗游於京師士大夫間皆服其
高妙泰和中詔天下工於琴者侍郎喬君舉之於朝公待
詔於秘書監予幼年刻意於琴初受指於待詔弭大用

每得新譜必與棲嵒商確妙意然後彈之朝廷王公大人邀請棲嵒者無虛日予不得與渠對指傳聲每以為恨壬辰之冬王師濟長河破潼關涉京索圍汴梁予奏之朝廷索棲嵒於南京得之達范陽而棄世其子蘭挈遺譜而來凡四十餘曲予按之果為絕聲大率署令衛宗儒之所傳也余令錄之以授後世有知音博雅君子必不以余為徒說云壬辰仲秋后二日湛然居士漆水耶律楚材晉卿序

答楊行省書

某再拜復書於行省閣下辱書諭及辭位事請聞奏施行者惟聖代之深仁賞延於世偉閨門之內助貴繫於夫故行省李公雖稽北覲之期頗著南代之績時不適願天弗假年伏惟閣下族出名家世傳將種無兒女子之態有大丈夫所為吏民服心朝廷注意遂授東臺之任異舒南顧之憂今也抑意陳書引年求退懼折鼎覆餗之患避牝鷄司晨之譏雖曰謙尊而光曷若隨時之

義分茅列土無忘北闕之恩秣馬厲兵可報西門之役
今因人回謹復書以聞山川遼濶書簡浮沈比獲瞻依
更希調護不宣

進西征庚午元厯表

臣楚材言堯分仲叔春秋謹候於四方舜在璣衡旦暮
肅齋於七政所以欽承天象敬授民時典謨實六籍之
大經首書其事堯舜為五帝之盛主先務厥猷皎如日
星紀之方冊由此言之有國家者律厯之書莫不先也

是以三代而下若昔大猷遵而奉之星歷之官代有其人漢唐以來其書大備經元創法無慮百家其氣候之早晏朔望之疾徐二曜之盈衰五星之伏見疎密無定先後不同蓋建立都國而各殊或涉歷歲年之寢遠不得不差也既差則必當遷就使合天耳唐歷八徙宋歷九更者良以此夫金用大明百年纔經一改此去中原萬里不啻千程昔密今疎東微西著以地遙而歲久故勢異而時殊庚辰聖駕西征駐蹕尋斯干城是歲五月

之望以大明太陰當虧二分食甚子正時在宵中是夜
候之未盡初更月已食矣而又二月五月朔微月見於
西南校之於厯悉為先天恭唯皇帝陛下德符乾坤明
並日月神武天錫聖智夙資邁唐虞之至仁追羲軒之
淳化冀咸神而底義故奉天而謹時重勅行臺旁求儒
者臣魚蟲細物草芥微人初習周孔之遺書竊慕羲和
之陳迹俎豆之事靡遑諸已箕裘之業敢忘於心恨無
命世之大才誤忝聖朝之明詔欽承皇旨待罪清臺五

載有奇徒曠著龜之仕萬分之一聊陳犬馬之勞既校
厯而覺差竊效輦而改作今演紀窮元得積年二十二
十七萬五千二百七十歲今庚辰臣愚以為中元歲在
庚午天啟宸衷決志南伐辛未之春天兵南渡不五年
而天下畧定此天授也非人力所能及也故上元庚午
歲天正十一月壬戌朔夜半冬至時甲子正日月合璧
五星聯珠同會虛宿五度以應我皇帝陛下受命之符
也臣又推節氣之分減周天之杪去交終之率治月轉

之餘課兩曜之後先調五行之出沒大明一失於是一
新驗之於天若合符契又以西域中原地里殊遠創立
里差以增損之雖東西數萬里不復差矣故題其名曰
西征庚午元厯以繼我聖朝受命之符及西域中原之
異也所有厯書隨表上進以聞伏乞頒降玄臺以備行
宮之用臣誠惶誠懼頓首頓首謹言

西游錄序

古君子南逾大嶺西出陽關壯夫志士不無銷黯予奉

詔西行數萬里確乎不動心者無他術焉蓋汪洋法海
涵養之效也故述辨邪論以斥糠粃少答佛恩戊子馳
傳來京里人問異域事慮煩應對遂著西遊錄以見余
志其間頗涉三聖人教正邪之辨有識予之好辨者予
應之曰魯語有云必也正名乎又云思無邪是正邪之
辨不可廢也夫楊朱墨翟田駢許行之術孔氏之邪也
西域九十六種此方毗盧糠粃白經香會之徒釋氏之
邪也全真大道混元太一三張左道之術老氏之邪也

至於黃白金丹導引服餌之屬是皆方技之異端亦非
伯陽之正道疇昔禁斷明著典常第以國家創業崇尚
寬仁是致偽妄滋彰未及辨正耳古者嬴秦燔經坑儒
唐之韓氏排斥釋老辨之邪也孟子闢楊墨余之黜糠
丘辨之正也余將刊行雖三聖人復生必不易此說矣
己丑元日湛然居士漆水耶律楚材晉卿序

辨邪論序

夫聖人設教立化雖權實不同會歸其極莫不得中凡

流下士惟務求奇好異以眩耳目噫中庸之為德也民
鮮久矣者良以此夫吾夫子云中人以下不可以語上
也老氏亦謂下士聞道大笑之釋典云無為小乘人而
說大乘法三聖之說不謀而同者何哉蓋道者易知易
行非掀天拆地翻海移山之詭誕也所以難信難行耳舉
世好乎異罔執厥中舉世好乎難弗行厥易致使異
端邪說亂雅奪朱而人莫能辨悲夫吾儒獨知楊墨為
儒者患辨之不已而不知糠粃為佛教之患甚矣不辨

猶可而況從而和之或為碑以紀其事或為賦以護其惡噫天下之惡一也何為患於我而獨能辨之為患於彼而不辨反且羽翼之使得遂其奸惡豈吾夫子忠恕之道哉黨惡佑奸壞風傷教千載之下罪有所歸彼數君子曾不捫心而靜思及此也耶予旅食西域且十年矣中原動靜寂然無聞適有永安二三友以北京講主所著糠粃教民十無益論見寄且囑予為序予再四譯之辨而不怒論而不縵皆以聖教為據善則善矣然予

辭而不序焉余以謂昔訪萬松老師以問糠粃邪正之道萬松以余酷好屬文因作糠禪賦見示余請廣其傳萬松不可予強為序引以行之至今庸民俗士謗歸於萬松予甚悔之今更為此序則又將貽謗於講主者也謹以萬松講主之餘意借儒術以為比述辨邪論以行世有謗者予自當之安可使流言餘謗汙玷山林之士哉後世博雅君子有知我者必不以我為囁嚅云乙酉日南至湛然居士漆水耶律楚材晉卿叙於西域瀚海

軍之高昌城

寄趙元帥書

楚材頓首白君瑞元帥足下未審邇來起居何如昔承京城士大夫數書發揚清德言足下有安天下之志仍託僕為先容僕備員翰墨軍國之事非所預議然行道澤民亦僕之素志也敢不鞭策駕鈍以羽翼先生之萬一乎僕未達行在而足下車從東旋僕甚怏怏夫端人取友必端矣京城楚卿子進秀玉輩此數君子皆端人

也推揚足下談不容口故知足下亦端人也然此僕於
足下少有疑焉若夫吾夫子之道治天下老氏之道養
性釋氏之道脩心此古今之通議也舍此以往皆異端
耳君之尊儒重道僕尚未見於行事獨觀君所著頭
陀賦序知君輕釋教多矣夫糠粃乃釋教之外道也此
曹毀像謗法斥僧滅教棄布施之方杜懺悔之路不救
疾苦敗壞孝風實傷教化之甚者也昔劉紙衣扇偽說
以惑衆迨今百年未嘗聞奇人異士羽翼其說者夫君

子之擇術也不可不慎今君首倡序引黨護左道使後
出陷邪岐墜惡趣皆君啓之也千古遺恥僕為君羞之
糠粃異端也輒與佛教為比萬松辨賦甘泉勸書反以
孟浪巨蠹之言處之以此行已化人僕不知其可也僕
為足下輕釋教者良以此也夫於所厚者薄無所不薄
君既輕釋教則儒道斷可知矣君之於釋教重糠粃於
儒道則必歸楊墨矣行路之人皆云足下吝嗇故奉此
曹圖其省費故也昔諸士大夫書來咸謂足下以濟生

靈為心且吾夫子之道以博施濟眾為治道之急誠如
路人所說則吾夫子之道亦不可行矣又將安濟生靈
乎又君序頭陀賦云冀請宗師祈冥福以利斯民足下
民之儀表也崇重黷蕩毀斥宗師將一郡從風漸化斷
知斯民罪惡日增矣又將安以利斯民乎僕謹撰辨邪
論以寄幸披覽之更請習涉藏教稽考儒書反復參
求其邪正之岐不足分矣僕素知君為邪教所惑亦未
敢勸諭君不以僕不才轉託諸士大夫萬里相結為友

故敢以區區忠告易曰方以類聚物以羣分經云士有爭友故身不離於令名若知而不爭安用友為若所尚不同安可為友或萬一容納鄙論便請杜絕此輩毀頭陀賦板以雪前非如謂僕言未當則請於茲絕交夏暑比平安好更宜以遠業自重區區不宣

萬松老人評唱天童覺和尚頌古從容庵錄序
昔余在京師時禪伯甚多惟聖安澄公和尚神氣嚴明
言辭磊落予獨重之故嘗訪以祖道屢以古昔尊宿語

錄中所得者叩之澄公間有許可者予亦自以為得及
遭憂患以來功名之心束之高閣求祖道愈亟遂再以
前事訪諸聖安聖安翻案不然所見予甚惑焉聖安從
容謂余曰昔公位居要地又儒者多不諱信佛書惟搜
摘語錄以資談柄故余不敢苦加鉗鎚耳今揣君之心
果為本分事以問予予豈得猶襲前愆不為苦口乎予
老矣素不通儒不能教子有萬松老人者儒釋兼備宗
說精通辨才無礙君可見之予既謁萬松杜絕人迹屏

斥家務雖祁寒大暑無日不叅焚膏繼晷廢寢忘餐者
幾三年誤被法恩謬膺子印以湛然居士從源目之其
參學之際機鋒罔測變化無窮巍巍然若萬仞峰莫可
攀仰滔滔然若萬頃波莫能涯際瞻之在前忽焉在後
回視平昔所學皆硯礫耳噫登東山而小魯登泰山而
小天下者豈虛語哉其未入閩域者聞是語必謂予志
本好異也惟屏山閒閒其相照乎爾後奉命赴行在扈
從西征與師相隔不知其幾千里也師平昔法語偈頌

皆法隆公所收今不復得其藁吾宗有天童者頌古百
篇號為絕唱余堅請萬松評唱是頌開發後學前後九
書間闕七年方蒙見寄予西域伶仃數載忽受是書如
醉而醒如死而甦踴躍歡呼東望稽首再四披繹撫卷
而嘆曰萬松來西域矣其片言隻字咸有指歸結款出
眼高冠今古是為萬世之楷模非師範人天權衡造化
者孰能與於此哉予與行宮數友旦夕游泳於是書如
登大寶山入華藏海巨珍奇物廣大悉備左逢而右遇

目富而心飮豈可以世間語言形容其萬一邪予不敢
獨擅其美思與天下共之京城惟法弟從祥者與僕為
忘年交謹致書請刊行於世以貽來者乃序之曰佛祖
諸師埋根千丈機緣百則見世生苗天童不合抽枝萬
松那堪引蔓湛然向枝蔓上更添芒索穿過尋香逐氣
者鼻孔絆倒行玄體妙底脚根向去若要脚根點地鼻
孔撩天却須向這葛藤裡穿過始得甲申中元日漆水
耶律楚材晉卿叙於西域阿里瑪城

評唱天童拈古請益後錄序

雪竇拈頌佛果評唱之擊節碧巖錄在焉佛果頌古圓
通善國師評唱之覺海軒錄在焉是濟寧雲門互相發
揚矣獨洞下宗風未聞舉唱豈曲高和寡耶抑亦待其
人耶必有通方明眼判斷尚未晚也昔佛鑑拈八方珠
玉集至及其半每至曹洞夾嶺石霜三宗機緣留付佛
果今佛鑑佛果拈八方珠玉集具在愈可疑焉三大老
後果有天童覺和尚拈頌洞下宗風為古今絕唱迄今

百年尚無評唱者予忝承餘暇固請萬松老師評唱之
欲成三宗鼎峙之勢恐拈覆餗貞吝之譏今評唱頌古
從容庵錄已大播諸方評唱拈古請益後錄時老師年
已六十有五矣循常首帶佛事人情晷隙之間侍僧請
益旋舉旋錄皆不思而對應筆成文凡二十七日百則
詳備神鋒穎利於斯見矣若夫據令於臨濟棒喝以前
發機於雲門三句之外豈更與佛果圓通殘餒爭長哉
俊快衲子舉一明三瞥見全鼎則為仰法眼雙鉉亦宛

然矣但恐信不及徒勞話歲寒也吁士辰重陽日湛然
居士漆水耶律楚材晉卿序於天山

燕京崇壽禪院故圓通大師朗公碑銘

師諱祖朗姓李氏蘓州漁陽人也九歲出家禮燕京大
聖安寺圓通國師為師大定十三年京西弘業寺受具
至二十一年改弘業為大萬安禪寺有司承制師充知
事厥後拂衣駐錫聖安復為舉充監寺崇壽禪院者實
圓通國寺退老之舊居也以師為宿舊之最承安間堅

請師為宗主住持一歷十稔又奉勅選香林禪寺開山
提點凡三載勅賜總持大德答其勤也既而崇壽復請
住持載閱五春貞祐間奉勅改賜今號度門徒凡十有
一人咸有肖父之風焉師前後輔翼叢林不憚艱苦讓
功責已潛德密行不可驟舉師以壬午之仲冬十有四
日示寂於崇壽僧臘五十三俗壽七十四師將順世預
召其屬徒笑謂曰生緣我將盡矣屬徒退而相謂曰師
神色自若若無他疾安得遽有是事邪后七日師命侍

僧執筆代書頌云咄這皮袋常為患害繼祖無能念佛
有賴來亦無來去亦無碍四大各離一時敗壞且道還
有不敗還者麼良久云浮雲散盡月昇空極樂光中常
自在語竟乃閉目跏趺而寂於是遐邇緇素弔祭如雲
嘉聲遠震愈光於生前矣其弟子輩瘞靈骨於師翁靈
塔之左去京城之南可三里之許丁亥之冬予奉詔搜
索經籍馳傳來京有庵主志興者師之受戒弟子也
晚得法於聖安澄公圓照大禪師以僕素與朗師善

囑予求碑銘僕素愛師之純古灑落與之遊者久矣師
嘗云予晚節愈堅於持誦日念彌陀聖號數萬聲方止
譬如抱河梁而浴又何害焉今聞師之寂也七日預知
時至雅符龍猛祖師之證無乃持誦之驗與噫聖人豈
欺我哉豈欺我哉萬松老人為宗門之大匠四海之所
式範素慎許可嘗贊師之真曰德譽燁沉靈骨鏗金訥
於言而敏於行璞其貌而玉其心勅選提封於國寺天
資飽練於禪林子徒知寒蟬將脫尚嫻餘吟吾以謂陞

圓通之堂者稽古依然接武於方今云萬松見許如是
人可知矣僕聞師侍從圓通國師最久而又臨終之際
超然自在疑必得法於國師或因緣未合或受國師密
訓不令出世亦石霜素侍者之儔侶與崇壽禪院方丈法
堂叢林制度一如聖安師久據而不請禪伯住持者亦
猶素侍者平欺老黃龍下視兜率悅之意歟予恐後世
明眼人責備於賢者累師之重德故雪之於此後之子
孫當幹父之蠱毋蹈前轍以玷師之高名烏湛然居士

再拜而作銘曰

偉哉朗公

誕跡漁陽

師侍圓通

達與穿堂

肅然震命

屢提國寺

退已讓人

舉廢脩墜

兒孫衆多

酷奉彌陀

心期極樂

迹厭娑婆

擺手便行

預知時至

臘五十三

壽七十四

奔喪赴祭

緇素駢闐

嘉聲播遐

愈盛生前

京南之原

茶毗靈骨

素塔凌空

朗師不沒

佯癡放憨

素公同參

蔑視兜率

平欺匾南

不邀宗匠 冷閒方丈 垂手無人 老殘龍象
予聞君子 責備乃賢 毋以微瑕 累乎大全
云子云孫 幹父之蠱 載震師名 永揚萬古

庚寅年六月望日

貧樂庵記

三休道人稅居於燕城之市傍其庵曰貧樂有湛然居士訪而問之曰先生之樂可得聞歟曰布衣糲食任天之真或鼓琴以自娛或觀書以自適詠聖人之道歸夫

子之門於是息交遊絕賓客萬慮泯滅無毫髮點翳於胸中其得失之倚伏興亡之反覆初不知也吾之樂良以此耳曰先生亦有憂乎曰樂天知命吾復何憂居士進曰予聞之君子之處貧賤富貴也憂樂相半未敢獨憂樂也夫君子之學道也非為已也吾君堯舜之君吾民堯舜之民此其志也使一夫一婦不被堯舜之澤者君子恥諸是故君子之得志也位足以行道財足以博施不亦樂乎持盈守謙慎終如始若朽索之馭六馬不

亦憂乎其貧賤也卷而懷之獨潔一已無多財之禍絕
高位之危此其樂也嗟流俗之未化悲聖道之將頽舉
世寥寥無知我者此其憂也先生之樂知所謂矣先生
之憂不其然乎道人瞪目而不答居士笑曰我知之矣
夫子以謂處富貴也當隱諸樂而形諸憂處貧賤也必
隱於憂而形諸樂何哉第恐不知我者以為洋洋於富
貴戚戚於貧賤也道人曰他人有心予忖度之吾子之
謂矣請以吾子之言以為記丙子日南至湛然居士漆

水耶律楚材晉卿題

自贊

別來十年五歲依舊一模一樣髭髯垂到腰間眉毛儼然眼上龜毛稚子畫虛空寫破湛然閒伎倆

其二

有髮禪僧無名居士人道甚似我道便是塵塵剎剎露全身紙上毫端何處避

燕京大覺禪寺刼建經藏記

遼重熙清寧間築義井精舍於開陽門之郭傍有古井
清涼滑甘因以名焉今朝天德三年展築京城仍開陽
之名為其里大定中寺僧善祖有因緣力道俗歸嚮者
衆朝廷嘉之賜額大覺貞祐初天兵南伐京城既降兵
火之餘僧童絕跡官吏不為之恤寺舍悉為居民有之
戊子之春宣差劉公從立與其僚佐高從遇輩疏請與
公和尚為國焚脩因革律為禪興公罄常住之所有贖
換寮舍悉隸本寺稍成叢席可容千指瑞像殿之前無

垢淨光佛舍利塔在焉殘缺幾仆提控李德者素黨於糠粃不信佛教至是改轍施財完葺其塔繼有提控晉元者施蔬圃一區於寺之南以給衆用餬口粗給庚寅之冬劉公以狀聞朝廷招提院所貯餘經一藏乞遷於本寺安置許之於是與公轉化檀越創建壁藏斗帳龍龕一週凡二十架飾之以金繪之以彩窮工極巧煥然一新計所費之直白金百笏能事告成累書請湛然居士為記余慨然曰昔者聖人之藏書也貯之以金匱寫之

於琬琰重道尊書以示於將來也浮屠氏之建寶藏者亦猶是乎吾夫子刪詩定書明禮贊易六經之下流為諸子春秋以降散為史書較其卷軸不為不多矣兵革以來率散落於塵埃中吾儒得志於時者曾無一人為之裒集置之淨室安之寶架豈止今日也哉承平之世間有儒冠率集士民脩葺宣聖之廟貌者曾未卒功已為有司糾劾矣且以擅興之罪罪之噫吾道衰而不振者良以此夫昔雪巖示寂於玉山時萬松老人方應詔

住持仰嶠訃問既至不俟駕而行遇完顏子玉諸塗子
玉嘆曰士人聞受業之師物故也雖相去信宿之地未
聞躬與其祭者豈有千里奔喪者耶佛祖之教源遠流
長者有自來矣子玉屢以此事語及士大夫今與公禪
師非為子孫計無取功名心汲汲皇皇丐乞於道路惟
以佛宮秘藏為務可謂不忘本矣予已致書於諸道士
大夫之居官守者各使營葺宣父之故宮亦由興公激
之也云癸巳中秋日記

湛然居士集卷八

欽定四庫全書

湛然居士集卷九

元 耶律楚材 撰

和張敏之詩七十韻

敏之學士遠寄新詩七十韻捧讀之餘續貂以尾
聊資一笑

壯年多轢軻晚節歎行藏故國顏綱穢新朝明德香雄
才能預算大略固難量迭出神兵速無敵我武揚本圖

服叛逆何止剪濤張西討窮于闐東征過樂浪彗侵天
壘壁光動太白鉞整整車徒盛鱗鱗旗鼓望天皇深責
重賢帥廟謨臧江左將禽楚河陽已滅商英雄皆入轂
強禦敢跳梁採訪軒車開司農官吏忙輕徭常力足薄
賦不財傷勲業起秦漢規模邁帝王流言無管蔡奇計
有平良增葺脩文物耕耘古戰場蛟龍方奮迅鵬鷃得
翱翔偶遇風雲會爭依日月光永峙千古恥一怒四夷
攘虎帳十年夢龍庭幾度霜迎降初請命出郭遠相將

久敵真宜死寬恩何敢當救書民有幸歌詠壽無疆扶
杖聽黃詔稱觴進白狼散財竭庫藏拔將出戎行殷絕
仁猶在周傾道不亡來詔燕郡內入覲大食傍戎服貂
裘紫星輶駸馬蒼中春辭北望初夏過西涼瀚海涵而
湧陰山徬且徬間雲迷去路疎雨潤行裝出處空興嘆
風光自斷腸典型陳故事利病上封章天下援深溺中
州冀小康風俗承喪亂籌策要優長痼疾如神附遊魂
笑鬼俵仁術能骨肉靈藥起膏肓避禍宜緘口當言肯

拈囊遭讒心欲剖涉苦胆先嘗北漠絕窮域西隅抵大
洋詩書猶不廢忠信未能忘羶補連腮帳緝穿朽脚沐
郊行長野興人靜若禪房回鶻交遊熟崑崙事跡詳風
煙多黯黯雲水兩茫茫災變垂乾象妖氛翳太陽髯龍
三島去玉葉一枝芳明主初登極愚臣敢進狂九疇從帝
錫五事合天常大樂陳金石朝服具冕裳降升分上下
進退有低昂拓境時方急郊天且未遑應兵無血刃降
虜自壺漿安堵無更肆因敵不愧糧宸心尊德義聖政

濟柔剛恩澤涵諸夏威靈震八荒勢連西域重天助止
方強舉我陪三省求賢守四方錦衣捐義褐肉食棄糟
糠隱逸求新仕流亡絕故鄉百官欣戴舜萬國願歸唐
耕釣咸生遂工商樂未央會將封泰岳行看建明堂每
嘆才雕篆長慙學面牆君恩余久負賢路我深妨覆餗
恒憂懼持盈是恐惶故山松徑碧舊隱菊花香太守方
遺舄初平政牧羊厚顏居此位若已納于隍吟嘯須歸
去香山老侍郎

再用張敏之韵

我愛張公子丁年密退藏施為宜法則議論自馨香元
氣却不死深陂豈可量兒時供府薦壯歲已名揚汲汲
尊尼父堂堂類子張遷居擇隣里濯足揀滄浪作傳編
毛隸談玄說劒芒奇才千古重令聞萬民望氣壓四明
容辭窮三耳臧典謨師我舜雅頌起予商綿蕞曾陳漢
仁術屢說梁本非中酒困長為和詩忙道長茹連拔時
衰心獨傷篆文適似李隸字楷如王青眼予能作白眉

君最良萬言陳國利一戰捷文場出海游龍舞騰空翥
鳳翔十全君子行一代士林光句法吾師範詩材我竊
攘忠心常向日直節欲凌霜文沒歲云久道亡天未將
狂瀾時既倒木鐸子宜當德業能純粹學術靡理疆衝
天憎燕雀當路惡豺狼綺語吟千韵宸章掃十行行藏
關治亂出處卜興亡郡隸清河上家居杜曲傍登科年
甫冠修史鬢初蒼仙觀嘗新欠宮園醉晚涼朝天恭謁
踏退食獨徜徉得暇多休沐游山小治裝一卮持竹葉

左手把無腸官酒澆三斗宮詞唾百章阮聲師校尉琴
訣受嵇康似玉風神異如蘭氣味長坦懷無戚戚明見
笑依依草檄堪醫疾鍼詩可治盲博聞敵武庫身價重
珠囊憂患經多故艱難已備嘗悲歌聲歷歷雅調韻洋
洋造次必於是中心何日忘生涯兩書篋香火一禪牀
海上尋徐福壺中覓長房流傳雖若此真偽甚難詳水
國波奔激仙鄉路渺茫孤身朝北闕皓首嘆東陽險韻
嚼佳句殘英嗅冷芳仁人今尚在箕子本佯狂洪範明

皇極彞倫叙有常百王遺禮樂三代舊軒裳會補南極
缺能令北斗昂無媒言囁嚅失志思迴遑秋老空悲扇
天涼反賣漿却來頻渭釣又絕在陳糧志道衰猶夢依
仁老更剛故家三徑遠薄土一廛荒混混常無捨乾乾
體自強率躬能省已行道不踰方寧恥身衣褐誰嗟日
食糠起歌明月夜舒嘯白雲鄉綺夏終辭漢巢由固避
唐名極得三者柴立杙中央榮遇傳金馬題名刻玉堂
未窺君所蘊徒見子之牆遣欲絕形累無貪不行妨一

瓢渠樂逸陋巷我憂惶義易韋編暗麟經古卷黃著述遵
輔嗣去取笑公羊再辨麟絕筆重箋城復隍焦桐人不
識獨有蔡中郎

讀唐史有感復繼張敏之韵頗有脂粉氣息邊
就聲韵故也呵呵

唐室承平久遺賢不遁藏羅紉桑屋臙餅餌麥疇香馬
牧初蕃息民編莫校量邊臣閑虎略衛士斂鷹揚禁苑
晨鍾動梨園錦障張披香風細細太液水浪浪河漢明

方潤長庚淡不銖羽旌儀兩列冠蓋道相望諫士陳休
戚廷臣論否戚金石歌大雅琴瑟奏清商青鳥迷鴛瓦
烏衣繞畫梁供張官府備餼饌太官忙共享清時樂殊
無謗議傷含元朝百辟花萼宴諸王主上貞觀聖官僚
魏鄭良歲餘開武講春首闢文場異寶浮淮水餘糧朽
鳳翔諸羌來入衛百濟請觀光關塞沈烽火鄉閭息寇
攘三春常若雨六月不飛霜聖德躋朝夕仁心本就將
俯知人意順仰視帝心當曠騎輕關內精兵重北疆朝

建潛巨壺方鎮養貪狼粉面三千輩金釵十二行持盈
當忌滿居治不知亡相罷曲江去權移林甫傍華清高
岫岫驪嶠碧蒼蒼金屋眠春曉溫泉浴暮涼掖庭花爛
漫閣道路彷徨宮監金犀飾妖姬珠玉裝危絃驚醉耳
哀調斷柔腸燈燭輝鴉鵲絲篁沸建章奢淫幾桀紂純
儉劣成康擊柝宮城邃傳籌禁漏長謀懼長汲汲沉醉
若俵俵未悟薪及爇誰知病已盲人撼碧玉笛腰佩絳
香囊嶺表千山遠荔枝三日嘗仙衣吹渺渺蓮舸泛洋

洋力士權誠重楊釗寵不忘承恩趨寶座奏事近牙牀
熒惑頻侵斗秋陽弗集房人心咸怨怒天象不披詳易
水聲嗚咽燕山水鬱茫盜賊充上郡鼙鼓起漁陽殺氣
凌金闕繁霜殞玉芳環兒剛賜死天子懼如狂戰士皆思
變奸臣亦易常空閒塵羯鼓誰舞舊霓裳忠義心徒順
英雄志自昂翠華搖曳曳鸞馭去遑遑禁嚮庖供豕
村民路進漿隘兵蜀道險餬口益州糧靈武兵聲振汾
陽意氣剛復收京闕克重治寢園荒賊勢時深蹙官軍

力益強羽書傳劍閣龍駕返南方御府仍無酒飢民尚
噉糟邛都求道士蓬島覓仙鄉符使將歸漢真妃猶憶
唐金釵分一股鈿合擘中央揮淚春風殿傷心秋月堂
梧桐籠院砌桃李映宮牆佳夢真難得幽懽頗有妨春
宵成怨憶秋夜愈悲惶尚記修眉綠猶思半額黃強舒
鸞被翠閒殺輦車羊陵谷俄驚海滄浪已變隍臨風一
卮酒聊復酌三郎

次韵黃華和同年九日詩十首

黃華和同年九日詩以採菊東籬下悠然見南山
為韻予愛而繼之前叙思歸之心後述參玄之志
所謂倒食甘蔗者也

秋香真可人不為無人改自慙寒昔盟東籬子空待我
獨搖酒卮不得寒英採臨風望故園參商二十載

其二

西風殘日秋有客嗟幽獨偶爾得香醪淒然憶霜菊世
態屢遷變人生多返復十年一夢中猶未黃粱熟

其三

無花復無蝶不似今秋窮黃花歲歲別九日年年同我
居北海南子在西山東公子會何日一醉閒愁空

其四

當年別吾山曾與黃花期富貴非予志卜築臨東籬今
也違初心知我者其誰掛冠猶未遂寄此相思詩

其五

無意戀三公有心辭駟馬洛陽失金谷閭山有別野芳

酒瀉盈樽秋香折盈把沉醉卧西風不讓梨花下

其六

汨沒紅塵中辜負黃花秋林泉與朝市試問孰為優胡
然久沉首令我心悠悠酷思山水樂夢寐空神遊

其七

歲月不我與彈指及衰年平生諳萬事抵死參重玄因
緣不可滯慎毋法自然兩邊都不立別有壺中天

其八

無知豈真知無見非真見遮照玄縱橫機關千萬變虎
口幾橫身臨敵經百戰三折為良醫一交學一便

其九

五流分洞下一派起湖南春水無心碧秋山着意嵐林
濟真顛漢曹山放酒酣許多閒伎倆子細好生參

其十

水外猶逢水山前更有山原知非內外更不在中間測
海纔盈掬窺天見一斑樞機漫竭世一筆請君刪

寄雲中東堂和尚

雲中種出火蓮華到底東堂是作家
伏手骨樞腰下劍笑人家具手中蛇
三玄戈甲徒心亂五位君臣莫眼花
只這些兒難理會草鞋包裹破袈裟

謝萬壽潤公和尚惠書

多謝堂頭遠賜書驚人手筆我難如
承當禪髓心無愧供養佛牙力有餘
幼子可襲先父業游人却到舊時居
箇中消息誰能悉玉女乘風跨鐵驢

燕京大覺禪寺與公乞經藏記既成以詩戲之
詞源老去苦無功強著閒文讚釋迦箇健兔毫生月窟
光明繭紙出新羅金爐幾辦龍涎燼玉板十分鳳墨磨
比起科差真可笑湛然陪酒更陪歌

新獲紫玉板
硯於友人

寄龍溪老人乞西崑香

寄語龍溪老古錫西崑風韻我長思香錢緩發鳴琴後
瓦鼎濃薰入定時比擬梅魂祇獨步品量龍腦可同馳
湛然鼻孔撩天大穿過多時不自知

謝聖安澄公饋藥

一粒靈丹寄我嘗
湛然回簡謝西堂
救活一草真難會
藥病相治未易量
子細嚼時元不碍
渾淪吞下也無妨
聖安骨董知多少
賣弄千年舊藥方

和王正夫韻

壯年自笑鬢先霜
喜色眉間一點黃
退食紫宸居鳳閣
朝天丹闕列鴛行
功名必要光前古
富貴何須歸故鄉
濟世元知有仁政
活人不假返魂香

和孟雲卿韵

歸與奚待鬢雙皤無限閭山聳岌我萬壑松風思仰嶠

千島烟雨憶平陂

仰山平陂皆燕然名剎也

開基氣槩鯨吞海遁世

生涯罍飲河好買扁舟從此逝醉眠江國一漁蓑

次雲卿見贈

濟濟千官侍玉宸尊賢容衆更親親風雲際會千年少
天地恩私四海均西狩一蘓張掖亂南巡重變大梁春
車書南北無多日萬里河山宇宙新

和王正夫憶琴

道人塵世厭鶯塵，白雪陽春雅意深。
萬頃松風皆有趣，一溪流水本無心。
忌機觸處成佳譜，信手拈來總妙音。
陶老無絃猶是剩，何如居士更無琴。

繼宋德懋韻三首

聖人開運億斯年，睿知文明本自天。
旁午衣冠遊北海，縱橫耕釣滿居延。
月氏入貢稱屬國，日本觀光列戶編。
威震西溟千萬里，漢唐鴻業亦虛傳。

其二

笑我區區亦強為故園荒矣欲何之讀書測海持螺測
覺道窺天以管窺疲俗不禁新疾苦濫官難撫發瘡痍
才微任重宜求退自有當途國手醫

其三

廣平流落寓平城親老家貧強苟生炎漢蕭曹賢政事
李唐房杜美聲名進求高譽千金重退隱閒身一葉輕
應繼開元舊勲業華堂鐘鼓對長檠

和平原張彥升見寄

天兵出雲中一戰平城破居庸守將亡京畿遊騎邏有

客赴澶淵

予嘗倅開州

無人送臨賀姦臣興弑逆時君遠遷

播聖主得中原明詔求王佐胡然北海遊不得南陽卧

寵遇命前席客星侵帝座萬里金山行三選玉門過于

闌歲貢脩燉煌兵勢挫國維張禮義民生重食貨黜陟

九等分幽明三載課小人絕覬覦賢才無輟軻功名本

忌盈廟堂難久坐老矣盍歸來歸與可重和俯仰不必

慙寬弘從面唾清濁自沙汰精粗任揚簸賦性嗜疎閒
高眠樂慵慵蒼雞粗庖充黃犢足犂拖幼子事耕鋤老
妻供碓磨隨分養餘齡雖飢而不餓

跋白樂天慵屏圖

三盃兀兀元如道一覺昏昏恰似真不識香山慵睡意
知音自有箇中人

和請住東堂疏韵

東堂不肯卧西堂珍御鮮食別樣裝枉費青帘三百尺

雲中公子不來嘗

寄倪公首座

亨監逃海淹齏瓮隆老成龍過禹門獨有倪公尚癡坐
幾時承繼萬松軒

和呂飛卿

一試戎衣大定初達賢不得退閒居盟津既渡諸侯喜
親見王舟躍白魚

戲陳秀玉并序

萬壽堂頭自汴梁來遠寄萬松老師偈頌舊本有
和節度陳公一絕云清谿居士陳秀玉要結蓮宮香火緣
賺得梢翁搖艫棹却云到岸不須船噫三十年前已有此
段公案湛然目清谿為昧心居士者厥有旨哉僕未忝萬松
時秀玉盛稱老師之德業爾後少得受用皆清谿導引之
力也每欲報之秀玉竟不一染指故作是詩以戲之
不見桃源路渺茫騎驢覓驢清溪招引到仙鄉未當好心湛然幸
得麴麴飽也須吐却擘與些兒不肯嘗恰似真个



湛然居士集卷九

欽定四庫全書

集部

湛然居士集卷

十至十四

詳校官中書

臣沈

颺

主事

臣

呂雲棟覆勘

總校官編修

臣

王燕緒

校對官編修

臣

施應培

謄錄監生

臣

蕭文鉅

欽定四庫全書

湛然居士集卷十

元 耶律楚材 撰

扈從冬狩

癸巳扈從冬狩獨予誦書於穹廬中因自譏云

天皇冬狩如行兵
白旄一麾長圍城
長圍不知幾千里
螭龍震慄山神驚
長圍布置如圓陣
方騎雲屯貫魚進
千郡野馬雜山羊
赤熊白鹿奔青驤
壯士彎弓殞奇獸

更驅虎豹逐貪狼

御間有馴豹縱之以搏野獸

獨有中書僊遊客放

下簾簾誦周易

用秀玉韻

甲午之秋秀玉殿學遠以新詩寄東坡杖因用元
韻以謝之

七尺烏虬乳節堅清谿寄我我忻然敢輕黑鐵三十兩
遠勝黃金百萬錢好句君堪坡老敵清詩予負定公先
他年携此林泉去靜倚松軒誦大全

送西方子尚

西方子尚氣凌雲一見忘年各任真
陰德傳家宜有慶
義方垂訓不違仁
雄文固可魁天下
確論曾無詭聖人
天產英才須有意
好將吾道濟斯民

用樗軒散人韵謝秀王先生見惠東坡杖

圓方頂足法高卑
五九蒼蒼老節奇
一日湛然獲二寶
東坡鐵杖寂通詩

和邦瑞韵送行

幸有和林酒一尊

尚醖出於和林
城故有是句

地爐煨火為君溫昔

年相見興三嘆此日臨行贈一言士行莫忘直報怨人
情須信害生恩而今躍入驚人浪珍重風濤過禹門

謝西方器之贈阮杖并序

了然居士素蓄東坡鐵杖洎地字號阮真絕世之
寶也天兵既克汴梁先生携二君來燕欲藏之恐
不能終寶欲贈湛然南北相去不知其幾千里慮
中道浮沉是以獻諸秀玉殿學田公奉御欲轉致

於余也甲午之秋陳田入覲果饋之於我因亂道
數語用酬厚意

睢陽三絕從來傳坡仙鐵杖為之先宋朝四美豈易得
地君神器稱乎賢了然居士隱洛渥讀書好古有積年
擒龍捉日獲二寶寶之鑿棟屋壁穿龍庭萬里疊山川
欲來饋我嗟無緣將奪固與此理玄殷勤携贈陳與田
陳田今歲來朝天惠然出賜穹廬前烏虬入手蒼壁懸
恍然遺世如登仙長蛇倚壁光娟娟鱗介欲生如蜿蜒

澄澄秋月瑩朝鏡須臾洗盡余腥膻足方法地頂法乾
四十五節松柏堅七尺烏金三十兩微篁瑟瑟鳴哀蟬
雲頂纖纖空腹圓十三玉柱鴻翩翩耽耽雲坐踞猛虎
巖巖山口雙雙絃鐵君伴我遊林泉足疾頓減雲衝烟
臨風三弄碎瓊玉清商秋水聲涓涓安仁得此如臨淵
子聃求杖不惜錢湛然坐受非勞力不勝其服心胡然
西方諷我求終焉故令二友相招延抱桐扶杖問山巔
舉觴笑詠秋風邊

了然居士作鐵君傳云長七尺重三十兩頂圓足
方中有微篁凡四十五節世傳嵇生造又云昔顯
宗東宮時嘗讀東坡鐵杖詩因召侍臣鄭子聃問
杖之存亡子聃以在睢陽為對因以數千緡購於
張文定公之孫其孫藏之於屋棟子聃竟不得一
見云地字號阮亡宋之故物天地玄黃此四阮為
絕寶也泰和間秘於禁中侍詔孫安仁之姊以琴
阮得入侍上以此阮賜之安仁屢求之其姊以阮

見寄舊制宮掖中侍人不許與親戚通耗安仁冒
法得之其好事有如此者故予引用其語

繼希安古詩韻

垂盡絃綸不上鉤冥鴻高舉弋無由不圖垂譽流千古
安肯低眉謁五侯

和非熊韻

蠻觸功名未足誇掀髯一笑付南華他年擊破疑團後
始覺從來盡眼花

和非熊韵

藹藹英聲鎮北州
非熊人物本風流
時逢佳客開青眼
久領元戎尚黑頭
已發豐城神劍出
休嗟暗室夜光投
驅兵經略關中了
顯過長安舊酒樓

過深州慈氏院

今年庖從次饒溝
暫解征鞍慈氏遊
世變劫灰何所有
人隨兵火鮮能留
堂堂聖像孰曾識
熒熒真詮詎可求
醉墨淋漓灑塵壁
使人知我過深州

用李君實韻

多病逢秋苦未宜天涯屈指故人稀
塵飛滄海悲人世夢斷黃梁笑錦衣
靜樂浮榮誰兩得官情歸興本相違
高山流水無窮思撫弄絃桐為發揮

繼崔子文韻

崔子龍鍾亦可憐臨風相逢我胡然
君來玉塞三千里余隱龍沙二十年
美玉詎容藏韞櫝精金到底入鈞甄
他時定下搜賢詔先到河東汾水邊

繼武善夫韵

老子年來酷愛閒，不堪白髮映蒼顏。
十年興廢悲歡裏，半世干戈寤寐間。
北闕欲辭新鳳閣，東州元有舊閭山。
熊經鳥引聊終老，崑下疎松正好攀。

鼓琴

宴息穹廬中，飽食無用心。
讀書費目力，苦思嫌哦吟。
搏捕近博徒，圍棋殺機深。
洞簫耗余氣，秦筑惡鄭聲。
呼童炷梅魂，索我春雷琴。
何止消我憂，還能禁邪淫。
正席設

樂几危坐獨整襟尋徽促玉軫調絃思沉沉清聲鳴鶴
驚古意鏘石金秋水洗塵耳秋風振高林清興騰八表
成連何必尋絃指忽爾忘世事如商參泥塗視富貴晝
夜等古今湛然有幽居祇在閭山陰茅亭遠流泉松竹
幽森森携琴當老此歸去投吾簪

扈從羽獵

湛然扈從狼山東御閑天馬如游龍驚狐突出過飛鳥
霜蹄霹靂飛塵中馬上將軍弓挽月脩尾蒙茸卧殘雪

玉翎猶帶血模糊
騷騷嘶鳴汙微血
長圍四合匝數重
東西馳射奔追風
鳴鞘一震翠華去
滿川枕藉皆豺熊
自笑中書老居士
擁鼻微吟弓矢廢
向人忍耻乞其餘
瘦兔癆獐紫駝背
吾儒六藝聞吾書
男兒可廢射御乎
明年准備秋山底
試向如臯學射雉

狼山宥獵

扈從車駕出獵狼山圍既合奉詔悉宥之因作是詩

君不見武皇校獵長楊裏子雲作賦誇奢靡又不見開
元講武驪山傍廬陵修史譏禽荒二君所為不足法徒
令千載人雌黃吾皇巡狩行周禮長圍一合三千里白
羽飛空金鏑鳴狡兕雄狐應絃死翠華駐蹕傳絲綸四
開湯網無掩羣天子恩波沐禽獸狼山草木咸忻忻

對雪鼓琴

君不見党侯賞雪斟羊羔蛾眉低唱白雪謠慷慨尊前
一絕倒高談濶論誇雄豪又不見陶穀開軒收竹雪旋

燒活火烹團月笑撫吟鬚吟雪詩冷淡生活太清絕清
歡濁樂爭相高至人視此輕鴻毛嗜音酣酒元粗俗癖
茶嚼句輕劬勞龍庭飛雪風淒冽天地模糊同一色數
卮美湏溫如春三弄悲風絃欲折酪奴歡伯持降旌詩
聲歌韻不敢鳴党武陶文都勘破真識此心無一箇

寄水室散人

佳人原不是摩登幻術因循汚此生對雪解吟飛絮句
滅燈能審斷絃聲鳳樓蕭洒閒瓊客水室深沉冷玉笙

好訪龍溪善知識傳燈何啻總持名

三學尼長老道號龍溪老人

寄平陽潤和尚

張彥升寄平陽潤和尚所著金盞兒十首因作詩

寄潤公

十首新詞寄我時淨名手段我獨知解將沒孔鐵鎚子
打就無聲金盞兒言外翻騰閑曲調剗前拈弄古鈴鎚
清河露布聲公案賺得衰翁一首詩

紅梅

以東坡謂認桃無綠葉辨杏有青枝太粗俗用潤
飾其語成之

瘦損佳人冰雪姿天教粧抹入時宜小桃嫌鋪翠雲葉
疎杏驚看碧玉枝李白詩成怒妃子吳宮宴罷醉西施
而今辜負黃昏月只少西湖處士詩

又

天仙皎皎素羅裳淡抹濃塗總不妨酒暈半潮妃子醉
胭脂初試壽陽粧肯同桃杏迷蜂蝶本與松筠傲雪霜

顧影也應悲漢室臨風猶似怨三郎

吟醉軒

修竹千竿五畝宮幽居活計興無窮清詞麗句梅詩老
白髮蒼顏歐醉翁洒墨疾書千首敏浮白痛飲百尊空
醉吟間有香山老倒用顛拈意暗同

寄西庵上人用舊韵四首

別後無緣得再參新詩重寄代和南他年放我休官去
只向雲川結小庵

其二

功名我已讓曹參
又見曹參定五南
布襪青鞋從此始
濟源聞有侍中庵

其三

多幸松軒得罷參
玉泉山水勝江南
泉邊便作歸休記
何必香山覓舊庵

其四

憶昔吾師萬松老也
放晚參揚兵西北
擊東南一聲霹靂
龍

飛去尚有痴人宿草庵

和漁陽趙光祖二首

崑廊深責忝疑丞位重材輕負寵榮猶虜七擒輸葛亮
奇謀六出愧陳平未行禮樂常如慊欲掛衣冠似不情
何日對君言我志夜闌秉燭笑談傾

生民垂欲陟春臺南斗妖氛絕點埃典禮已隨前代廢
遺音猶怨後庭哀十年嘆我垂垂老萬里憐君得得來
此語縱無多忌諱絨題未可對人開

再過太原題覃公秀野園

君實洛陽園花竹秀而野先生取此意開園臨古社土
堦甃以石茅亭略其瓦佳木碧雲搖清泉寒玉瀉開軒
叩琴筑撫景飛觴斝我来政秋晚殘英折盈把粲然啟
一笑琅然歌二雅將歸且裴回幽尋未能捨呼酒盡餘興
索筆為模寫緬懷溫國公重名滿天下寥寥二百年童
卒傳司馬君侯築茲圃如有所慕者晞顏顏之徒子亦
斯人也

和韓浩然韵

浩然以昇元寶器玉潤鳴泉二
琴見贈勉和來詩用酬厚意

標格雄雄蘊藉深烏龍胸臆隱雷音一雙神器波及我

不負分金結義心

浩然得四琴分二
琴於我故有是句

一曲南風奏古宮坐賄神物愧無功千金厚惠將何報
鶚表慇懃效孔融

張漢臣因入覲索詩

漢臣千里覲龍庭欲使天皇致太平十事便宜言懇切
三千貔虎令嚴明好籌廟算如留相莫憶鱸魚似李鷹

一統要荒君勉力雲臺須占最高名

和謝招宣韵

失矣為劣得奚優遇流而行坎則留笑視紛紛兒女輩
成是敗非徒相尤棄人所取取所棄獨識萬松為出類
本欲心空及第歸暮請晨參唯一志浮生迅速奔隙駒
無窮塵劫元斯須參透威音劫前事花開枯木誰云枯
河朔干戈猶未息西域十年空旅食賢人退隱予未能
釣衡曠位虛名極真人應運康世屯數頒寬詔垂絲綸

沛若恩波淪骨髓皇皇四海咸蒙春漢唐疆宇非為大
戍守西臨玉關界百濟稱藩過海門鄙語粗言其大槩
天皇自將辦多多天兵百萬涉長河京索為空汴梁下
秦皇漢武疇能過凜凜威聲震天宇不殺為功果神武
朔南一混車書同皇業巍巍跨千古先生吾邦之彥兮
樂琴書而自怡偃徒松柏操磊落英雄資明正道無邪
思一貫詩書繼先覺兩全才德真吾師王謝來江左家
學易道豈忘貽濟世須君展驥足政要再鑿人耳目小

子區區何所祝但願天衷俞鶚奏

德恒將行以詩見贈因用元韵以見意

國士朝黃屋無辭路八千徒嗟蘓子困誰識稱生賢腰
下無金印山中有翠烟英雄須有用勉力待中年

送文叔南行

李子敦純不入時而今失志又南歸縱無手內毛生檄
自有囊中菜子衣未得忠貞毗聖主且將甘旨侍慈闈
鵷雛不忘冲天志直待三年更一飛

和馮揚善九日韵

馮君今歲又離家
攜手賡酬海一涯
秦漢興亡真夢寐
蘓張輾軻莫吁嗟
孔融座上尊盈酒
靖節籬邊菊有華
何日公餘同此樂
西風一醉泛流霞

示石州劉企賢

西州來索湛然詩
笑點霜毫錄鄙辭
底事行藏元有數
斯文否泰本由時
碩才未信明君棄
雅操何慙酷吏欺
此語頗涉人忌諱
等閒勿使細民知

和劉子中韵

蓬山散人劉詡子中頗通儒幼依全真出家今已
還俗故有擇術不可不慎之句

蓬山北海遊珥筆陳良謀徒步而南來意氣凌馬周貧
吏亂法令如茨不可束子中有大志每甘胯下辱他日
得從龍其鋒誰敢觸今日君之來非為五斗粟君子慎
擇術痛恨倍全真調心正是妄堪笑學烏伸一日錯下
脚萬劫含酸辛平生大夢中不識庵中人一言贈吾子

宗匠宜相親

李庭訓和余詩見寄復用元韵以謝之

忝位台司歲月深中書自笑不如岑殷周禮樂真予事
唐舜規模本素心鄭五每慚難作相胥靡終欲強為霖
隴西妙語虛推獎舒卷寒窓盡日吟

和黃山張敏之擬黃庭詞韵

黃山無媒亦無梯蕭條白晝闕荆扉凌晨端坐嗽玉池
闌干首肯先生飢惠然寄吾黃庭詞湛然一笑幾脫頤

一鶴南翔一不飛十年一夢今覺非故山舊隱蒼松敲
而今老盡虬龍枝曾學四老食紫芝從譏懷寶而邦迷
塵緣一掃無了遺隔穀觀月猶依稀汪洋法海無邊涯
螢光詎可窺晨晞蓮花自是生汙泥汙泥不染清涼肌
彩雲易散碎琉璃人間四相天五衰有為無為俱有為
壽窮塵劫元非遲湛然醉搖芭蕉卮薔薇深蘸書淋漓
白眼一望須彌低黃山先生耽書癡退藏不露龍鱗姿
對人不恥敝縕衣自甘貧困元知微籬邊黃菊香離披

門前山色寒差參不以下體遺葑菲新詩遠寄盤龍螭
胸中滿貯夷齊薇忘機臨水狎鷗鷺燕居申申不愆儀
含光隱秀如文犀乘閒綸釣垂清漪躬耕禾黍方離離
須信君子能自卑予知先生之獨悲深憂海内生民疲
生民擾攘如焚絲笑予素餐徒位尸先生識鑑如元龜
旁通發而為聲詩照我窮廬生光輝窮通進退元有時
至人終不貪危機他時天子求壘篴欲行周禮脩周基
先生好應千年期沙堤行人羨輕肥鳳皇到底鳳池棲

太平鈞石須君持蒼生未濟無言歸

寄嵩公堂頭同參

嵩公聞道住南宮笑寫新詩託去鴻
準備金桃三百顆因風寄與老髯公

寄耶律子春

說與沙城劉子春湛然垂老酷思君
同遊青塚春將盡共飲天山酒半曛
蠟紙題詩熟練字檀盧談道細論文
五年回首如真夢衰草寒烟正斷魂

寄妹夫人

三十年前旅永安鳳簫樓上倚闌干

先叔故居樓名

初學書畫

同遊戲靜閱琴碁相對閒聚散悲歡燈影裏興亡成敗
夢魂間安書風送來天際望斷中州一髮山

送姪九齡行

我欲歸休與願違而方知命正宜歸閭山自有當年月
一舸西風賦式微

送姪了真行

吾兄繼世祿襲封食東平幼子死王事長女閨門英孀
居二十年禮佛讀傳燈一旦遇宗匠了真訓其名前歲
陽翟破道服潛偷生寧死不受辱託疾燕山京湛然憐
孤族贖汝為編氓死生本如夢寵辱真若驚莫忘離亂
苦長思厭世情三學有龍溪叩參宜盡誠喝碎須彌山
打破乾闥城兩頭俱放下枯木一枝榮

和少林和尚英粹中山堂詩韵

我愛嵩山堂山堂秋寂寂蒼烟自搖蕩白雲風出入冷

冷溪水寒細細琴絲濕離塵欲無事又有閒蹤迹

和武善夫韻

不得潛身似許由
鑿閭辜負萬山秋
未竭犬馬雖為慙
忽憶猿鶴却自羞
黃閣賴懸新篆印
白霄元有舊漁舟
他時雪夜尋良友
且學當年王子猷

和馮揚善韻

揚善從來慕晉卿
滄浪濁處不濯纓
關東易學孰能與
冀北詩聲莫與京
今日窮途雖蹇剝
他時行道自亨貞

須知避世元無悶，莫怨龍鍾出帝城。

和董彥才東坡鐵杖詩二十韻

女媧未補青天裂，神液飛精散為鐵。嵒生箕踞鍛洪爐，
白汗翻漿滴清血。黑虬彷彿欲飛躍，鱗介蒼蒼生乳節。
情知中散氣凌雲，肯與凡工爭巧拙。柳君傳與東坡老，
神物終須歸俊傑。坡仙為壽文定公，酬和新詩誇勝劣。
觀妙堂名龍瓦硯，睢陽並此為三絕。睢陽城破兵火炎，
神器不隨烟焰滅。了然居士出伊洛，登山渡水相扶挈。

燕然分付我清谿妙語雕鐫跨先哲遠來携贈白霄老
天理似為余所設湛然忝位本無功致主澤民愧臯契
再造北海復何恨與君同步龍沙雪大澤深山無所驚
掃除魑魅驅凶蟹輕篁歷歷吐微語閒對幽人如鼓石
有時拈起擊須彌須彌擊碎同丘垤雲門遠遁德山去
敢對髯翁開口說一時驚倒野狐禪奔走不來余間關他
年神武掛冠去誰知劫外乾坤別橫擔此杖入千峰大方
獨步無蹉跌

自贊

美髯中書白衣居士從我抹粉施朱一任安名立字手
中玉塵震雷音說盡人間無限事

湛然居士集卷十